


**AWIG – AWIG
DESA ADAT PIKAT
DESA PIKAT, KECAMATAN DAWAN
KABUPATEN KLUNGKUNG**



TAHUN 2021

MURDHA CITA

OM Swastyastu,

Malarapan Asung Kertha Wara Nugraha Ida Sang Hyang Parama Wisesa lan paswaran gilik saguluk kayun suci nirmala warga, Awig-awig Desa Adat Pikat puput kasurat. Awig-awig Desa Adat Pikat kasurat matatujon ngulati kasukertan. Awig-awig puniki maka titining pamargi ngruruh tatuek Sang Hyang Sastra agama , Agama Hindu, inggih punika tatwa, susila, upakara. Tatuek puniki kaanggen gegambelan ngardi sepat siku -siku ngajegang desa lan Bali santih. Awig-awig puniki pinaka sanjata nabdabin kasukertan kalih kasutreptian desa adat manut Tri hita karana.

Ngawit isaka warsa 1912 utawi warsa masehi 1990, Desa Adat Pikat sampun maduwe awig-awig sane kasurat ring buku lan ring lontar. Riantukan aab jagate nyansan obah, ngametuang paridabdab kauripan para jana nyansan ngelimbak tur nincap, mawesana awig-awig sane riin patut kanutan. Tatimbang inucap, metu pikamkam nguwah nguwuhin awig-awig. Warga Desa Adat Pikat gilik saguluk, paras paro, salunglung sabaya antaka lan sarpana ya mawastu puput nguwah nguwuhin . Uwah-nguwuhin awig-awig sampun kasungkemin nglantur kakukuhang ring paruman Desa Adat Pikat lan kapasupati. Risampune uwah-nguwuhin awig awig puniki kakukuhang, Awig awig Desa Adat Pikat isaka warsa 1912 utawi warsa 1990 kadaut tur kajantenang nenten mamargi malih..

Om Santih, Santih, Santih Om.

**DAGING BUKU AWIG – AWIG
DESA ADAT P I K A T**

1. Murdha citta	1
2. Daging buku awig – awig desa adat Pikat	2
3. Prathamas Sargah : Aran lan wawidangan desa.....	4
4. Dwityas Sargah : Pamikukuh lan Patitis	4
5. Trityas Sargah : Sukerta tata parahyangan	
a. Palet 1 : Indik Dewa Yadnya	4
b. Palet 2 : Indik Resi Yadnya.....	8
c. Palet 3 : Indik Pitra Yadnya	8
d. Palet 4 : Indik Manusa Yadnya	11
e. Palet 5 : Indik Bhuta Yadnya	11
6. Caturthas Sargah : Sukerta Tata Pawongan	
a. Palet 1 : Indik Warga lan krama	12
b. Palet 2 : Indik Prajuru Desa.....	15
c. Palet 3 : Indik Paiketan Desa	19
d. Palet 4 : Indik Kukul	20
e. Palet 5 : Indik Paruman lan Sangkepan	21
f. Palet 6 : Indik Pawiwahan	22
g. Palet 7 : Indik Nyapian	24
h. Palet 8 : Indik Sentana lan Paperasan.....	25
i. Palet 9 : Indik Warisan	26
j. Palet 10 : Indik Penyanggran Desa Utawi Banjar	27
7. Pancama Sargah : Sukerta Tata Palemahan	
a. Palet 1 : Indik Druwen Desa	28
b. Palet 2 : Indik Karang lan Carik	28
c. Palet 3 : Indik Pepayonan.....	30
d. Palet 4 : Indik Wewangunan.....	30
e. Palet 5 : Indik Wewalungan.....	30
8. Sadthas Sargah : Bhaya,Wicara Miwah Pamidanda	

a.	Palet 1	: Indik Baya	31
b.	Palet 2	: Indik Wicara	31
c.	Palet 3	: Indik Pamidanda	32
9.	Saptamas Sargah	: Nguwah Nguwuhin Awig-Awig	32
10.	Astamas Sargah	: Pamuput	33

PRATHAMAS SARGAH
Aran Lan Wawidangan Desa
Pawos 1

1. Desa adat puniki mawasta Desa Adat Pikat.
2. Jebar Kakuwub wawidangannya mawates nyatur :
 - ha. Sisi kangin, tepi kauh Desa Adat Pesinggahan
 - na. Sisi Kelod, tepi kaler Desa Adat Pesinggahan
 - ca. Sisi Kauh, tepi kangin Desa Adat Pangi
 - ra. Sisi Kaler, tepi kelod Desa Adat Gelogor
3. Desa Adat Pikat kawangun antuk karang desa utawi gebogan krama lan kakuwubnyane, sane kepah dados tigang banjar luire :
 - ha. Banjar Adat Intaran Buug
 - na. Banjar Adat Cempaka
 - ca. Banjar Adat Sente

DWITYAS SARGAH
PAMIKUKUH LAN PATITIS
Pawos 2

Pamikukuh Desa Adat Pikat:

1. Pancasila.
2. Undang-undang Dasar 1945.
3. Tri Hita Karana manut sadacara Agama Hindu.
4. Ilikita guru wisesa mapaiketan desa adat.

Pawos 3

Patitis Desa Adat Pikat:

1. Mikukuhang kalih ngarajegang Sang Hyang Agama.
2. Nginggilang tata prawertening magama.
3. Ngarajegang kasukertan desa, saha pawongan nyane sakala niskala.

TRITYAS SARGAH
Sukerta Tata Parahyangan
Palet 1

Indik Dewa Yadnya

Pawos 4

1. Pura Panyiwian Desa Adat Pikat luiuré Pura Puseh, Pura Desa utawi Bale Agung, Pura Manik Mas, Pura Dalem Setra.
2. Rahina Piodalan sowang-sowang pura inucap:
 - ha. Pura Puseh : Buda Kliwon Dunggulan utawi Galungan, Satunggil kalih warsa nepek Purnama Kapat kamargiang Ngusaba Desa lan Nini (Ngusaba Kaja) masarengan ring Pura Desa utawi Bale Agung.

- na. Pura Desa utawi Bale Agung : Buda Kliwon Dunggulan utawi Galungan.
Satunggil Saniscara Umanis Watugunung kamargiang upacara pujawali Saraswati.
- ca. Pura Dalem Setra : Anggara Kliwon Tambir.
Satunggil Tilem Sasih Kasanga kamargiang Ngusaba Kelod.
Satunggil Perwani Tilem Sasih Kapitu kamargiang upacara Siwa Ratri, pamargin nyane kategtegang antuk pararem.

Pawos 5

1. Sowang-sowang Pura Kahyangan Desa patut kaadegang Pamangku
2. Tata cara ngadegang mangku:
 - ha. Mawit saking keturunan mangku pura inucap
 - na. Nyanjan utawi nuwur
 - ca. Kasudi olih pangempon tur kasungkemin krama Desa Adat.
 - ra. Risampun mawinten wenang ngarangsuk sasananing mangku
 - ka. Kakukuhang olih Prajuru Desa.
 - da. Mangku ring Pura Dalem Setra wenten mangku pamucuk wenten mangku pangabih.
Mangku pamucuk mawit sakeng Desa Adat Pikat, Mangku Pangabih sakeng Desa Adat Pangi
3. Sang tan dados kaadegang mangku:
 - ha. Ceda angga sadurung mawinten.
 - na. Mabukti mabuat tan patut manut sastra agama utawi tulak ring pamargi dresta.
 - ca. Risedek katiben sungkan
 - ra. Dura warga Desa Adat Pikat.
4. Prabea Kapamangkuan :
 - ha. Pawintenan kasanggra pangempon pura.
 - na. Prade seda, plebon kasanggra pangempon pura wantah aswasta geni utawi malarapan darma piadung.

Pawos 6

- Swadharmaning mangku luire:
1. Puluk ngamargiang lan nginutin Catur Bandana Darma
 2. Asewaka Dharma Astiti bhakti ring Ida Sang Hyang Widhi
 3. Ngenterang wiadin ngastawayang sahananing upacara-upakara ring pura ritatkala patirtaan utawi yadnya sane siyosan, manut kawenangan nyane.
 4. Ngalaksanyang Tri Kaya Parisuda.
 5. Stata nganutin sesananing pemangku.
 6. Nuntun krama desa mangda satata bakti ring Ida Sang Hyang Widhi manut sastra agama.

7. Pamangku-pamangku merajan utawi dadia kawenangannyane wantah ring marajan utawi pura dadia sowang sowang,
8. Pamangku-pamangku merajan utawi dadia muah Pemaksan kangkat ngaturang ayah ring pura Kahyangan Tiga yening sampun polih nunas panugrahan ring silih tunggil pura kahyangan tiga malarapan pituduh sang sulinggih sane pacang muput.
9. Pamangku sane kantun sajeroning wicara tan kapatutang nganteb upakara.
10. Pamangku patut ngayah maresik ring pura sane kaemong, sane tan patut kaambil olih krama pangempon.
11. Sios ring pamangku kayangan tiga tan kawenangan nedunang, ngalinggihang pralinggan Ida Betara Kahyangan Tiga.

Pawos 7

1. Yan prade pamangku sane ngarep keni kapialang, jantos tan prasida ngamargiang upacara ring pura inucap, patut upacara punika kamargiang olih pamangku Kahyangan Desa sane siyosan, sangkaning polih uwakan mangku pamucuk utawi pinunas Jro Bandesa.
2. Yan wenten pamangku keni ujar ala, ulah ala, pamangku inucap patut maprayascita manut sastra agama, sang mojar ala, ulah ala patut keni prabeya upakara tur pamidanda manut pararem.
3. Yan wenten Pamangku sane maujar ala utawi maulah ala pamangku inucap patut nyepuh raga kesaksinin olih Prajuru Desa.

Pawos 8

Patitis lan olih-olihan Pamangku Khayangan Tiga

1. Kapisinggih olih warga manut linggih tur sasanannyane.
2. Luput ayah-ayahan rauhing panyundul nyane
3. Luput peson-peson pewangi, wawangunan ring pura sane kaempon.
4. Polih pah- pahan sasari manut pararem.
5. Polih muponin pelaba pura.

Pawos 9

1. Atur-aturan arta brana patut kadruwe olih pura inucap
2. Satunggil sane maturan ring pura inucap patut masadok majeng prajuru inucap tur kailikitayang lan kauningang majeng krama pangempon.
3. Aturan sakadi kecaping ajeng, wenang kaangge ring pura inucap manut tatujon.

Pawos 10

Ngentosin Pemangku sangkaning:

1. Seda
2. ngalap rabi tan rahayu.
3. kanorayang
4. nilar sasaning pamangku patut keni pamidanda manut pararem tur ngawaliang padruwen pura sane karaksa.
5. pinunas ngeraga

Pawos 11

1. Warga desa patut nureksain raga mangda kasukertan kahyangan manggeh kasucian nyane.
2. Sane tan kalugra ngaranjing ka pura utawi ring genah suci inggih punika:
 - ha. Sang sane kasinanggeh cuntaka utawi sebel luire:
 1. Kalampusan,
 2. Nyambut karya pitra yadnya masa utawi dadakan ngawit saking nunas atma rauh ngelemekin utawi ngelemiji.
 3. Sebel siosan manut sastra agama.
 - na. Sang sane kasinanggeh sebel sadurung maprayascita luire:
 1. Ngaraja utawi kotor kain.
 2. Panganten sadurung mabiya kala
 3. Ngembasang daging bobotan,
 4. Anak mobot durung wenten ngangkenin,
 5. Anak tanpa yayah maupakara utawi durung wenten ngupakarain pinaka pijanten
 - ca. Mabusana sane tan patut manut tata susila lan sastra agama.
 - ra. Sang sane makta sahananing barang sane kasinanggeh leteh tur sane tan kapatutang manut sastra agama mekadi luwun sema muah ane siosan.
 - ka. Sato ageng sajawaning mapepada
3. Sengker cuntaka utawi sebel kamanggehang sakadi ring sor:
 - ha. Ngeraja utawi kotor kain : Selamin ngeraja ngantos mersihin raga.
 - na. Ngembasang daging bobotan 42 rahina ngawit saking embas ngantos sampun ke-upakara manut agama, yan sane lanang 12 rahina.
 - ca. Kalampusan:
 1. Cuntaka babanjaran: arahina saking ngurug.
 2. Cuntaka pasemetonan Sang lampus 3 rahina saking ngurug.
4. Sane tan keni cuntaka luire :
 - ha. Ida Sang Sulinggih.
 - na. Para Pamangku Desa
5. Sahananing paritingkah lan laksana sane tan dados ring pura:
 - ha. Masumpah utawi mecoran, sajawaning sangkaning pamutus paruman.
 - na. Mabawos sane kasinanggeh wak parusia, wak capala.
 - ca. Ngias raga utawi ngentos busana sajawaning Sulinggih lan pragina.
 - ra. Masanggama, sirep lanang istri masikian sajawaning anak alit.
 - ka. Macecepin
 - da. Makoratan, mawarih, mangan lan nginum ngantos mamunyah muah sane siyosan sane tan manut ring sastra agama.
 - sa. marebat , masiat, ,napi malih rauh ngamedalang rah ring tri mandala pura.
6. Yan wenten kabuktiang manut tri pramana wenten sinalih tunggil krama malaksana sane kabawos ngaletihin sakadi kecap ring ajeng, wenang keni pamidanda manut pararem lan pamerayascita kahyangan manut sastra agama.
7. Yan wenten jadma karawuhan ring pamargi eedan yadnya patut kapintonin, prade rumasa kasumangsayain, yan tan wiakti, jadma inucap kasisipang manut pararem.

8. Kahyangan sane keni kadurmanggala patut kadadbdabin sagelis nyane.
9. Warga utawi tamiu sane ngarusak pura patut macikang sahananing sane karusak· tur ngupakarain manut sastra agama.

Pawos 12

Tata treptining ngaranjing ka Pura.

1. Ngayah makarya, patut ngangge busana adat alit.
2. Maturan pangabakti patut mabusana adat madya .
3. Busana Pamangku manut sesananing.

Palet 2

Indik Resi Yadnya

Pawos 13

1. Sang pacang madeg sulinggih patut masadok majeng Prajuru Desa kalih Parisadha Hindu Dharma Indonesia.
2. Prajuru Desa patut ngarauhang panuntun manut dresta utawi uger-uger guru wisesa.
3. Sang sulinggih prade kantun pinaka krama polih laluputan ayahan lan papeson.
4. Pakaryan lan prebeya padwijatian sang madeg sulinggih kangkat:
 - ha. ngarsayang panyanggra karya majeng krama banjar utawi krama Desa adat
 - na. Muatang warga desa adat ngemargiang sesana manut dresta.

Pawos 14

1. Risampun madeg sulinggih, prajuru patut nyobyahang bhisekan sang madeg sulinggih.
2. Sang madeg Sulinggih tan nganutin sesanan kawikon, prajuru patut nguningayang majeng nabeh Ida utawi majeng Parisada Hindu Dharma Indonesia saha nunasang pamatut.
3. Pamatut Sang Nabe utawi Parisada Hindu Dharma Indonesia patut kesobyahang olih prajuru.

Palet 3

Indik Pitra Yadnya

Pawos 15

1. Upacara mamrateka wong lampus kabawos Pitra Yadnya sakadi:
 - ha. Makinsan ring pratiwi utawi kapendem, kageseng.
 - na. Ngaben.
2. Mendem sawa utawi ngeseng mangda ring setra ugi. Prade sang rumaga sulinggih kaanutang antuk dresta.
3. Sang seda sadurung maketus untu patut kapendem pramangkin ring setra pamajangan tur tan katengerin kulkul.
4. Tan kedadosang mendem utawi ngeseng sawa ritatkala Purnama, Tilem, Pasah lan Puncak Puja Wali Kahyangan Desa. Prade pamargine kobet kangkat kapendem sasiliban risampun surup surya utawi durung endag surya.
5. Rikala wenten warga langkungan ring adiri ngawigunaang setra pacang mendem utawi ngeseng, pamargine mangda masarengang ngranjing kasetra.
6. Layon sane kasekeh langkungan ring tigang rahina, pagebagan pinih lami tigang rahina.

7. Tan kangkat nginepang bangbang layon

8. Ngaben ring desa utawi banjar wenten kalih soroh luire :

- ha. Ngaben dadakan : ngaben sawa anyar, sawa sane tan kapendem. Wawanengan nyane nenten langkungan ring pitung rahina utawi manut dewasa sane pinih nampek.
- na. Ngaben masa utawi kinembulan : ngaben sane kamargiang nganutin sasih pangabenan. Pretingkah ngaben masa utawi kinambulan:
- ca. Sang aduwe sawa masikian utawi kinembulan adung paigum tur kangkat kaenterang prajuru desa utawi banjar.
- ra. Warga sane ngaben masa utawi kinambulan ring dura desa utawi banjar tan polih panyanggran banjar.

Pawos 16

1. Wong lampus sangkaning salah pati, ulah pati pratekan nyane pateh makade wong lampus biasa. Upakara paweweh manut panikan sang sulinggih..
2. Wong istri kantun mobot lampus, kapendem risampun tan kantun ngadut bobotan.
3. Wong padem ring genah tan patut, warisnyane patut ngelaksanayang upakara manut pabuat.
4. Wong padem tan kelingang kasadokang majeng guru wisesa, upakara manut pabuat kamargiang olih krama desa. Prade sampun sumeken wenten ngangkenin, sang ngangkenin patut ngadung paigum pamargi.

Pawos 17

Warga wed magama Hindu sane lad ka dura Desa Adat Pikat, prade lampus utawi angga kakuuban nyane wenten lampus, kangkat ngawigunaang setra antuk gaguat:

1. Karihinin masadok tur molihang wakwakan prajuru desa adat.
2. Keni jinah pananjung batu manut pararem, tur ngaturang pakeling ring Pura Dalem manut sapituduh prajuru.
3. Ngaturang pamrayascita lan pacaruan eka sata brumbun ring setra.
4. Tan polih panyanggra krama desa sakemawon katodia prajuru.

Pawos 18

Swadharmaning krama ritatkala wenten kalampusan:

1. Krama sane madue kalampusan patut masadok majeng Bendesa adat utawi klian banjar nunas pamargi manut kawentenan.
2. Prajuru maritetes pamargin tur nyuarayang kulkul.
3. Krama desa adat utawi krama banjar patut sayaga nedunin tur ngeremba kawentenan karya sang kalampusan manut dresta.
4. Sang madue karya nyanggra krama desa utawi krama banjar sadarana manut dresta.
5. Krama desa patut ngamargiang pagebagan manut dresta.

Pawos 19

Tata Trepti Mamargi Nganter Layon utawi Sawa ka Setra.

1. Sang nedunin tan dados ngelintangin layon sejabaning sang pengenter karya utawi sang makta uparangga.
2. Pamargine alon, trepti tur dabdab, sang mamurug kadanda manut pararem.
3. Krama utawi warga sane ngamiletin patut mabusana adat madya.
4. Krama utawi warga kangkat ninggal risampun wenten wak-wakan prajuru

Pawos 20

Tata Cara Ngangge Setra

1. Sang pacang ngawigunaang patut nunas wak-wakan prajuru.
2. Ngawigunaang setra manut dresta miwah pituduh prajuru.
3. Ngagah layon mangda nganutin panugrahan Ida Sang Sulinggih, utawi manut dresta tur mesadok majeng prajuru.

Pawos 21

Pemargin Papatusan:

1. Patas masa manut pararem soang-soang banjar
2. Krama desa utawi banjar adat nyangra karya sapuputne.
3. Sang madue karya ngaturang pasuguh sadarana.

Patus dadakan :

1. Krama desa utawi banjar adat ngawantu sapuputne manut pituduh prajuru.
2. Krama desa utawi banjar adat ngamedalang patas manut pararem.
3. Sang madue karya ngaturang pasuguh sadarana
4. Krama banjar sane ngaben kangkat nunas patas lebeng.
5. Sang sane ngerauhin utawi madelokan nenten polih pangwales.
6. Bacakan patas luiirnyane Patas karya, patas lebeng, lan patas matah.
7. Pemargin patas manut perarem banjar.

Pawos 22

Indik Ngaben.

1. Krama desa sane pacang ngaben masa, tigang sasih, saking padewasannyane sampun puput bawos ring prajuru, raris digelis kelanturang ka krama desa.
2. Krama desa sane pacang ngaben masa, kangkat ngabenang sawa sameton dura, karihinin:
 - ha. Mapisadok majeng prajuru, tan kirang 21 (salikur) rahina sadurung pangabenan.
 - na. Tan Polih pangeremba lan patas saha keni penanjung batu manut pararem.
 - ca. Keni upakara sakadi patut ring pura dalem utawi setra.
 - ka. Taulan utawi niasa teosan kangkat kabakta sinarengan ritatkala ngamargiang ngagah ring Setra Desa Adat Pikat lan Pangi.
3. Krama desa sane melebonang utawi ngaben dadakan, polih patas dadakan manut pararem.
4. Warga wed sane sampun lad ka dura Desa Adat Pikat, kangkat mendem utawi ngaben dadakan ring setra Desa Adat Pikat lan Pangi antuk gaguat:

- ha. Mapisadok majeng bendesa utawi prajuru adat malarapan swalapatra pajanten genah makrama adat tur molihang wak-wakan
- na. Siaga naur pananjung batu manut pararem rikala matur piuning ring pura Dalem.
- ca. Siaga ngamargiang upakara pamrayascita manut pabuat

Palet 4
Indik Manusa Yadnya
Pawos 23

1. Manusa Yadnya inggih punika upakara lan upacara majeng manusa kantun murip.
2. Upakara lan Upacara manusa yadnya luire:
 - ha. Magedong-gedongan
 - na. Wawu embas.
 - ca. Kepus odel.
 - ra. Ngelepas aon mayusa 12 rahina
 - ka. Tutug akambuhan 42 rahina
 - da. Tigang sasih.
 - ta. Aweton.
 - sa. Mapetik .
 - wa. Ngempugin utawi tumbuh untu.
 - la. Pakupak utawi kepus untu
 - ma. Mungguh daha
 - ga. Mapandes.
 - ba. Mawiwaha
 - nga. Mawinten
3. Upakara lan upacara manusa yadnya ninutin sastra agama kanista, madya, utama kapuputang olih: Pemangku, utawi Pandita manut kabuatang.

Palet 5
Indik Bhuta Yadnya
Pawos 24

1. Buta Yadnya inggih punika yadnya sane matetuek nyomia bhuta.
2. Upacara Buta Yadnya kemargiang antuk Upacara Macaru
3. Undagan Buta Yadnya manut pabuat.
4. Buta Yadnya Rikalaning Tilem Kasanga kalaksanayang Tawur Kasanga .
5. Tawur Kasanga kamargiang ring Pura Dalem Setra kacihna antuk upacara ngodelin ring pempatan manut kadapet.
6. Soang-soang banjar sawewidangan Desa Adat Pikat patut ngamargiang pacaruan Nangluk Desa antuk upakara Panca Sata rauh rarututan nyane.

Pawos 25

Tawur Kasanga patut kalaksanayang kadi ring sor :

1. Melasti ka sagara manut dresta utawi manut kawentenan.
2. Rauh saking melasti pralingga Ida Bhatara Kayangan Tiga lan Pralingga Ida Bhatara sakti nyejer ring pura Dalem setra, lan pralingga siosan mewali ke penyimpanan soang-soang.
3. Sasampune taur kasanga, pralinggan Ida Bhatara Kayangan tiga lan Pralinggan Ida Bhatara sakti kasineb.
4. Soang-soang pumahan ngamargiang Upacara Pangrupukan .
5. Upacara Pangrupukan utawi mabuu-buu ring desa kapidabdabin prajuru.
6. Nepek rahina suci Nyepi (pinanggal apisan sasih kadasa) patut ngamargiang catur brata panyepian :
 - ha. Amati Geni
 - na. Amati Karya
 - ca. Amati Lalungan
 - ra. Amati Lalangon
7. Brata panyepian katuntun prajuru desa muang banjar,
8. Brata panyepian kemargiang mgawit jam 6 semeng rauh jam 6 semeng benjangne
9. Sang mabukti mamurug brata panyepian keni pamidanda manut pararem
10. Rahina ngembak geni mapiteges ngembak brata panyepian, kawentenang "pasimakraman"

CATURTHAS SARGAH

Sukerta Tata Pawongan

Palet 1

Indik Krama lan Warga

Pawos 26

1. Krama desa Adat Pikat inggih punika warga sane mipil utawi kasurat ring silih tunggil bacakan banjar adat wawidangan Desa Adat Pikat utawi ring bacakan Desa Adat Pikat.
2. Warga Desa Adat Pikat inggih punika krama rauhing sang sane kakuwub.
3. Sang dados kakuwub inggih punika jana maagama Hindu tur sampun polih saseleh prajuru banjar adat.
4. Krama Tamiu inggih punika warga Bali sane maagama Hindu jenek ring wewidangan Desa Adat Pikat nenten mipil sakewanten kasurat ring Desa Adat.
5. Tamiu inggih punika warga siosan ring krama adat Pikat lan krama tamiu sane jenek utawi patgatakala tur kasurat ring Desa Adat Pikat.

Pawos 27

1. Warga Desa Adat Pikat sane mayusa roras rauh pasasur warsa tur durung marabian patut ngranjing pinaka sabha yowana.
2. Angga Sabha Yowana kawawa olih klian nyane tur katuntun olih Bendesa lan prajuru desa adat rauhing prajuru banjar adat.

Pawos 28

1. Krama Desa Adat Pikat kapah manados krama ngarep lan krama tan ngarep.
2. Krama Ngarep inggih punika krama sane kantun jangkep pakurenan nyane tur weweg ngamarginin ayah desa.
3. Krama tan ngarep inggih punika krama sane kantun utawi tan kantun jangkep pakurenan nyane sane tan weweg ngamarginin ayah desa.
4. Krama tan marep, luwire :
 - ha. Krama Balu inggih punika krama tanpa pajangkepan nyane, maswadarma ngamong ayah abaluan.
 - na. Krama Ubuh inggih punika anaking krama katinggal guru rupaka sane mayusa kirang ring salikur warsa lan durung alaki rabi/masomahan, lepas sahananing ayah lan pamedalan.
 - ca. Krama Tapukan inggih punika anaking krama katinggal guru rupaka sane sampun mayusa sanistane salikur warsa tur durung masomahan, ayah nyane wantah atapukan. Prade kantun ngeruruh peajah-ajahan tur durung mayusa 25 warsa, lepas ayah-ayah. Risampune langkung 25 warsa, amongan ayah lan pamedalan atapukan.
 - ra. Krama Nyada inggih punika krama sane sampun mayusa nem dasa lima warsa ngatos suripa, lepas sehananing ayah lan pepeson.
 - ka. Krama Mlaga inggih punika krama sane kantun utawi tan kantun jangkep pakurenan nyane, sane melinggih ring dura Kecamatan Desa Adat Pikat. Manados Krama Mlaga malarapan pinunas. Sahananing ayah lan pamedalan kawilangin antuk jinah rupiah manut perarem banjar adat.

Pawos 29

Manados Krama Desa Adat Pikat, sangkaning :

1. Ngalinggihin karang desa.
2. Mawiwaha kapurusa .
3. Krama Tamiu lan Tamiu sangkaning mapinunas tur tegep gaguat.

Pawos 30

1. Panemaya manados krama desa :
 - ha. Melarapan antuk pawiwahan kapurusa tur sampun kailikitaang ring banjar sane ngawidangin lantur kadamyakan jeroning paruman desa nemoning Saniscara Pon Dungulan.
 - na. Krama Tamiu lan Tamiu sane sampun nganutin gaguat manados krama kasurat ring Desa Adat.
2. Sang mekrama desa patut :
 - ha. Ngempon Kahyangan Tiga miwah pura emponan desa.
 - na. Inut sedaging awig-awig lan parerem desa tegep saha sima dresta.
 - ca. Tegteg ngajegang lan ngawerdiang sima, dresta sane kantun kamanggehang.
3. Krama tamiu lan tamiu patut inut sahananing daging ilikita Desa Adat Pikat.

4. Swadarma Krama tamiu lan tamiu:
 - ha. Mapisadok majeng prajuru tan kasep ring arahina.
 - na. Naur punia manut pararem.
 - ca. Nginutin kasukertan Desa Adat Pikat
5. Swadikara Krama tamiu lan tamiu:
 - ha. Polih pangayoman Desa Adat Pikat
 - na. Polih ayah-ayah manut pabuat
6. Warga desa sane ngraksa tamiu patut masadok majeng kelian banjar nyane tan kasépan ring arahina.
7. Sang madunungan utawi tamiu sangkaning sungkan mabuat ngarereh tamba, tan keni urah arih manut pararem .
8. Sang madunungan utawi tamiu kandugi malaksana kawon, sang kadunungan patut negenang manut pararem.

Pawos 31

1. Krama sane sungkan rahat kantun mayusa soring 65 warsa, patut kaicen pawangkidan,
2. Krama nyada kangkat kaadegang manados prajuru desa, sabha desa, utawi kertha desa..

Pawos 32

Swadharmaning Warga Desa Adat :

1. Tan maren satya wirang majeng Desa Adat Pikat rauh sadaging nyane .
2. Satinut ring sadaging Awig - awig lan Pararem Desa Adat Pikat
3. Tan maren ngajegang saha nyungkemin kasukertan ring Desa Adat
4. Ngamargiang sapituduh Guru Wisesa lan prajuru desa manut Awig - awig kalih Pararem Desa Adat Pikat

Pawos 33

Krama sane magingsir mabanjar ring jeroning Desa Adat Pikat, patut molihang wak-wakan lan katampenin oleh banjar adat sane ka tuju.

Pawos 34

Wusan makrama sangkaning:

1. Puceh utawi nyamput.
2. Pinunas ngaraga tur sampun polih wak-wakan.
3. Kanorayang.

Pawos 35

1. Wusan makrama antuk pinunas ngraga tur molihang wak-wakan, risampune:
 - ha. Nyukserahang swalapatra pajanten raga nunas wusan makrama
 - na. Nyukserahang swalapatra tan ninggal tategenan ring Desa Adat sane kaembasang olih bendesa adat

- ca. Nyukserahang swalapatra desa adat sane nampenin madesa adat
- ra. Matur piuning malarapan pajati kaenter mangku ring pura desa
- ka. Nyukserahan swalapatra nenten nunas pah-pahan olih-olihan desa adat
- 2. Wusan makrama antuk pinunas ngraga tur molihang wak-wakan, prade mawali malih antes katampenin makrama antuk gaguat nyukserahang swalapatra sakeng bendesa utawi prajuru adat genah makrama.
- 3. Krama kanorayang prade mawali makrama, antes katampenin yening tegap nginutin gaguat makadi:
 - ha. Nunas pangampura ring jeroning paruman
 - na. Nyukserahang swalapatra nenten mabuat piwal
 - ca. Naur panuku jalarang kakanorayang kawewehin antuk naur panuku arta brana padruwen desa adat (mopog)
 - ra. Maupasaksi malarapan pajati sane kaenter mangku ring pura desa

Pawos 36

Swadikara Krama Desa Adat Pikat luire:

1. Polih pangayoman karahajengan pawongan muwah padruenyane.
2. Polih pangeremba rikala katiben baya, pakewuh wiadin kaduhkitan, madrebe karya muatang pitulung.
3. Nyarengin paruman lan sangkepan tur sareng mastikayang pamutus paruman.
4. Wenang nyudi lan kasudi pinaka prajuru mwang sane siyosan manut pabuat.
5. Polih pawangkidan manut daging pararem rikala:
 - ha. Katiben sungkan utawi bhaya, kaduhkitan
 - na. Ngamargiang yadnya sane jantos ngaturin krama.
 - ca. Ngalaksanayang yadnya sinarengan sareng yadnya Desa Adat.

Pawaos 37

Indik Leluputan

1. Mangku Kahyangan Tiga polih luput papeson lan peturunan .
2. Prajuru Desa polih luput pepeson marupa rarampen utawi raramon.

Palet 2

INDIK PRAJURU DESA

Pawos 38

1. Desa Adat Pikat katuntun olih Prajuru Desa Adat
2. Sane kebaos prajuru desa inggih punika :
 - ha. Bandesa
 - na. Patajuh
 - ca. Panyarikan.
 - ra. Patengen.
 - ka. Para Baga
 - da. Kasinoman.

3. Prajuru Desa Adat Pikat kategepin Saba Desa lan Kerta Desa.

Pawos 39

Gagwat dados prajuru , Sabha Desa lan Kertha Desa inggih punika

1. Krama Ngarep
2. Krama Nyada sane kabuatang olih krama Desa Adat Pikat tur sumanggup ngemargiang swadarmaning manut amongan.

Pawos 40

Tata cara ngadegang Bendesa:

1. Enem sasih rikanjek tugtug sengker, prajuru desa patut masobyah.
2. Bendesa kaadegang olih Krama Desa ring sajeroning paruman malarapan pararem panuntun ngadegang bandesa lan prajuru desa adat, lantur ngadegang prawartaka ngadegang bandesa.

Pawos 19

Krama sane madeg bendesa patut negepin prajuru manut pararem panuntun ngadegang bendesa lan prajuru desa adat.

Pawos 41

1. Sengker ayahan Bendesa lan prajuru desa adat 10 (dasa) Galungan.
2. Sang madeg bendesa utawi prajuru desa adat sakantun manut gagwat kangkat kaadegang malih.

Pawos 42

Swadarmaning Prajuru :

1. Ngenterang warga desa ngamargiang swadarma manut daging awig-awig lan pararem desa.
2. Nuntun warga desa ngupadi kasukertan desa manut petitis.
3. Maosin kalih niwakang pamutus marep warga sane mawicara .
4. Manados duta desa
5. Ngukuhin kalih ngrajegang druwen desa

Pawos 43

Bandesa lan Prajuru Desa Adat patut kaabih olih Sabha Desa lan Kertha Desa.

Pawos 44

Wawenang Prajuru Desa Adat

1. Ngukuhang pangrencana sane kadabdabin olih Labda Pacingkremen Desa utawi LPD lan Baga Usaha Padruwen Desa Adat utawi BUPDA.
2. Ngukuhang Rancangan Anggaran Pendapatan dan Belanja Desa Adat utawi RAPBDA dados Anggaran Pendapatan dan Belanja Desa Adat utawi APBDA satunggil ngawarsa.
3. Ngawigunayang padruwen Desa Adat sajeroning ngamargiang swadarma prajuru.

4. Ngadegang lan ngararianang Pengawas, Pengurus LPD , BUPDA, lan PACALANG risampune Kacumponin olih Sabha Desa.
5. Ngamargiang saseleh lan ngenterang sahananin parikrama Desa Adat.
6. Nibakang sahanan pamidanda manut pamutus paruman.
7. Ngangganin DesaAdat sajeroning midabdabin parilaksana hukum.
8. Ngamargiang kawenangan siosan manut awig-awig lan pararem.

Pawos 45

Bandesa lan Prajuru Desa Adat tan patut:

1. Mamurug awig-awig lan pararem.
2. Ngardi pamutus sane ngawetuang kaon.
3. Iwang ngawigunayang swadarma lan wawenang.
4. Maparilaksana sane ngametuang biota.
5. Dados angga Pengurus Organisasi terlarang.

Pawos 46

1. Bandesa lan Prajuru sane iwang sasana miwah ngalinyokin padruwen Desa, piwal ring awig-awig, pararem utawi paswara tur sampun mabukti, patut kadanda nikel.
2. Bendesa lan Prajuru sane iwang manut (1) patut ngewaliang sehananing duwen Desa utawi Banjar, saha pramangkin kerarianang manados Bendesa utawi Prajuru Desa Adat.
3. Pamargin pakraman katuntun olih Prajuru siosan ring sane kararianang.

Pawos 47

1. Bandesa utawi Prajuru Desa Adat kagentosin sangkaning:
 - ha. Sampun tutug sengker.
 - na. Seda
 - ca. Pinunas ngaraga tur sampun kadagingan ring jeroning paruman desa.
 - ra. Tan prasida ngamargiang swadarmaning kaprajuruan.
 - ka. Kanorayang.
2. Bandesa utawi prajuru sane kagentosin sangkaning wiwit 1 aksara na,ca,ra,ka wantah ngalanturang masa ayahan sane Kagentosin.
3. Prade sane kagentosin punika bandesa, pagentos punika kangkat sakeng prajuru sane kantun madeg lan krama sane manut gaguat.
4. Prade sane magentos wantah prajuru, pangentos punika kamargiang olih bandesa.

Pawos 48

Petias Bandesa Adat miwah Prajuru Adat:

1. Tan ngamedalin seluwiring jejahitan lan reramon.
2. Polih tuas manut kawentenan.

Pawos 49

1. Sajeroning swadarma ngamargiang pangrencana pakraman, Prajuru Desa kaabih olih Angga Sabha Desa.
2. Sajeroning swadarma ngamargiang panepas wicara, Prajuru Desa kaabih olih Kerta Desa.

Pawos 50

1. Sabha Desa kasudi olih Bandesa Adat, ring paruman Desa Adat sanistane 5 diri sane mawit saking utusan banjar adat.
2. Sabha Desa Adat mawiwit saking warga sane sujana lan Undagan Sabha Desa nganutin pararem.
3. Sabha Desa maweh darma tatimbang majeng prajuru desa mina kadi: ngarincikang daging awig-awig lan pararem, ngarencanaang wawangunan, ngarencanaang APBD, lan ngamargiang pawangunan desa.
4. Wawanengan Sabha Desa ingkup ring wawanengan sengker ayahan Bendesa lan Prajuru desa.

Pawos 51

1. Kerta Desa kasudi olih Prajuru Desa Adat sanistane 5 diri.
2. Kerta Desa mawiwit saking Prajuru Desa, krama sane maduwe kawiklanan risajeroning hukum adat lan kawiklanan sane seosan pinaka duta banjar adat.
3. Bandesa Adat pinaka pamucuk sapisan angga Kerta Desa.
4. Yening pamucuk utawi angga Kerta Desa wenten paiketan nyane risajeroning wicara, pamucuk utawi angga inucap nenten kapatutang nepasin wicara.
5. Prade pamucuk Kerta Desa kawicaraang utawi wicara mapaiketan majeng pamucuk Kerta Desa, pamucuk Kerta Desa kagentosin olih angga sane mayusa pinih lingsir.
6. Wawanengan Kerta Desa ingkup ring wawanengan masa ayahan Prajuru desa.

Pawos 52

Swadarma Kerta Desa:

1. Nampenin, nureksain, nepasin wicara.
2. Nepasin wicara mangda ngutamayang kasukertan madasar antuk druwenang sareng-sareng.
3. Prade tan ngamolihang wiwit kadi aksara na, Kerta Desa mutusang manut daging awig-awig utawi pararem.
4. Prade sang keni putusan nenten nagingin kantos waneng limolas (15) rahina, sang mawicara utawi para pihak kangkat ngarahang majeng Majelis Desa Adat manut undagan.

Pawos 53

Prajuru desa, Sabha Desa, Kerta Desa patut polih olih-olihan manut pararem.

Palet 3
Paiketan Desa Adat

Pawos 54

Desa Adat Pikat maduwe makudang-kudang paiketan, minakadi:

1. Paiketan mangku inggih punika pupulan warga sane sampun katambyakang pinaka mangku. Angga paiketan mangku maswadarma kukuh ngamargiang darma kapamangkuan, nincapang kaweruhan lan kawagedan indik kapamangkuan, tur mautsaha manados panuntun pamargi kaweruhan agama miwah sida manados tatuladan.
2. Paiketan serati inggih punika pupulan warga sane sampun maduwe kaweruhan kalih kawagedan indik wawantenan tur kacihnayang sampun mawinten kaseratian. Swadarma para angga ngukuhan wangun lan pamargin wawantenan manut sastra dresta kaadungan sareng dresta siosan. Para angga serati mautsaha pinaka panuntun satunggil parikrama ngamargiang upakara, upacara manut pabuat.
3. Paiketan werdha inggih punika pupulan warga sane sampun mayusa 65 warsa utawi langkung sane kaaturin galah lan genah nyagra wilasa lan kewarasan nyane tur kaanggen genah nunas piteket.
4. Pacalang inggih punika pupulan warga sane kaaturin swadarma widang kasutreptian lan kasukertan nganinin wawidangan desa rauh sadaging nyane.
 - ha. Pacalang kaadegang lan kararianang oleh Bandesa adat kadasarin antuk putusan Desa Adat, ring paruman Desa Adat.
 - na. Swadarma pacalang sane siosan inggih punika swadarma negara manut titah bendesa utawi prajuru siosan.
 - ca. Ring sajeroning nincapang kaweruhan, pacalang polih aguron-guron saking guru wisesa.
 - ra. Pacalang polih olih-olihan manut pararem.
 - ka. Swadarma pacalang kadabdabin nganutin tuntunan sasana pacalang.
 - da. Tuntunan sasana pacalang kamedalang olih Majelis Desa Adat
 - ta. Sengker ayahan Pacalang pateh ring sengker ayahan Bandesa lan Prajuru.
5. Paiketan yowana inggih punika pupulan para yowana warga Desa Adat Pikat sane ngemargiang swadarma kayowanan widang seni budaya, agama, lan tata titining kahuripan, rerincikan ilikitan nyane manut pararem.
6. Paiketan krama istri inggih punika pupulan istri krama desa adat sane maswadarma ngeromba swadarma krama desa kalih ngamargiang parikrama desa manut pabuat.
7. Pasraman inggih punika genah pajah-ajahan ngeninin Seni Budaya lan Agama Hindu.

Pawos 55

Paiketan Undagi :

1. Rikala ngemargiang pawangunan ring Desa Adat Pikat, Prajuru patut keabih olih Undagi akeh nyane manut pabuat.
2. Swadharmaning Undagi patut nitenin sehananing pewangunan Adat lan uparangga upakara.
3. Gaguat dados Undagi:

- ha. Sampun makrama/warga sane maduwe kaweruhan lan kawagedan kaundagian
 - na. Ngemargiang geginan undagi tur jumenek ring wawidangan desa adat.
 - ca. Mayusa nenten lintang ring 65 (enem dasa lima) warsa.
 - ra. Nenten ngeraksa sungkan rahat.
4. Sengker dados Undagi nginutin pawanengan bendesa, sasampune punika dados kasudi malih .
 5. Kausanang dados Undagi desa oleh Bendesa malarapan antuk :
 - ha. Seda.
 - na. Sampun tutug sengker
 - ca. Sakeng pinunas ngaraga tur maning sampun kalugrayang olih Bendesa.
 - ra. Sangkaning kanorayang dados Undagi desa.
 6. Undagi kengin nunas mapamit prade :
 - ha. Ketiben sungkan rahat.
 - na. Wusan makrama sangkaning kesah ke dura desa.
 7. Swadikara Undagi inggih punika
 - ha. Polih leluputan ayahan krama
 - na. Yaning makarya neren, undagi kaicen pikolih manut perarem.

Palet 4
Indik Kukul
Pawos 56

1. Kukul sane wenten ring wawidangan Desa Adat Pikat luire:
 - ha. Kukul desa adat.
 - na. Kukul Banjar Adat
 - ca. Kukul Pura
 - ra. Kukul sekaa-sekaa.
2. Suaran kukul kasinangeh tatenger majeng sane kawawa kukul inucap.
3. Pamargi sane patut macihna antuk suaran kukul :
 - ha. Pacang parum utawi sangkep
 - na. Pacang tedun makarya.
 - ca. Pacang mapitulung rikala kalayusekaran.
 - ra. Ritatkala wenten baya.
 - ka. Ritatkala wenten warga pradana rangkat alaki rabi.
 - da. Ritatkala wenten tamiu tedun makrama desa.
 - ta. Pamargin upacara ring pura lan pemargin pangrupukan.
 - sa. Ngawitin lan ngalebar Catur Barata Panyepian.
 - wa. Ritatkala Surya lan Bulan Kepangan.
4. Sane Kapatutang nyuarayang kukul wantah Prajuru, wiadin sang kapituduh olih prajuru manut pabuata nyane.
5. Sapasira ugi nyuarayang kukul tan sangkaning pituduh prajuru sawawaning wenten baya lan Surya utawi Bulan Kepaangan patut keni pamidanda manut pararem,
6. Tabuh tatepakan kukul :

- ha. Kalih tuludan panjang pacang parum utawi sangkep, makarya, Ngawit lan ngalebar catur brata panyepian .
 - na. Tigang kelentungan sada ban-ban, pacang mapitulung ring kalayu sekaran.
 - ca. Atuludan bulus, ritatkala keni baya
 - ka. Limang kelentungan ban-ban, puput sah warga kapradana mawiwaha
 - da. Pitung klentungan sada ban-ban, wenten tamiu tedun mekrama desa
 - ta. Ngempang masangsihan, upacara ring pura,.
 - sa. Solas klentungan banban, Surya utawi bulan kepangan
7. Tabuh tatepakan kulkul sekaa-sekaa patut kapidabdabin manut pasubayan sekaa-sekaa inucap.
8. Warga Desa Adat Pikat sane mekarya kulkul nenten kapatutang ngangen taru, saha tabuh tatepakan tan kepatutang matehin suaran kulkul sane kamanggehang ring ajeng.

Palet 5
Indik Paruman lan Sangkepan
Pawos 57

1. Paruman Agung Desa Adat Pikat inggih punika parum sane kamiletin olih krama jangkep. tur mawosang tata kasukertan desa adat.
2. Paruman Agung kamargiang satunggil wuku Dunggulan, prade wenten padgata kala, parum kamargiang karihinin antuk arah olih saya arah sangkanin pituduh Bendesa utawi Prajuru Desa.
3. Pasangkepan kamargiang patgatakala
4. Krama sane nenten nyarengin paruman utawi pasangkepan ngawit wuku Dunggulan ngantos mawali nemu wuku Dunggulan kabawos nemu gelang. Krama inucap patut katiwakin danda manut pararem.

Pawos 58

1. Parikrama sane kainggilang ring Paruman desa inggih punika ngardi putusan:
 - ha. Ngukuhang awig-awig;
 - na. Ngukuhang Bendesa lan Prajuru;
 - ca. Ngukuhang paridabdab mahautama pamargi pakraman.
2. Paridabdab mahautama madasar antuk Trihita Karana, minakadi:
 - ha. Nabdabin desa adat.
 - na. Ngarencana pawangunan desa.
 - ca. Ngamargiang paiketan pantaraning desa adat.
 - ra. Nabdabin padruwen desa adat.
 - ka. Mutusang paimdikan rencana investasi ring desa adat.
 - da. Ngadegang lan nabdabin LPD.
 - ta. Nabdabin BUPDA.
 - sa. Nguwah-nguwuhin padruwen desa.
 - wa. Ngawangun sarana prasarana, adat istiadat, darma agama, dresta, seni budaya.
 - la. Nincapang kaweruhang sajeroning pasraman.

- ma. Ngawerdiang lan ngawigunayang indik asal-usul, nilai adat, nilai agama, nilai sima, nilai seni lan budaya, miwah sane seosan manut pabuat.
3. Prajuru desa sane nenten ngalaksanaang paruman desa manut uger-uger, paruman kengin kalaksanaang olih angga sabha desa sane mayusa pinih anom lan pinih lingsir.
 4. Putusan paruman desa ngiket warga desa.

Pawos 59

Sajeroning sangkepan, Bandesa utawi Prajuru Adat patut nambyakang:

1. Papeson munjuk lungsuring ayah-ayahan.
2. Pamargin panelas arta brana druwen desa.
3. Pamargin usaha-usaha desa sane mabuat.
4. Sahanan wicara lan pamutusnyane.
5. Daging paruman miwah pasuaran-pasuaran sane mabuat.
6. Pidabdab prajuru nganinin usaha kertin desane kapungkur miwah sane sioasan.
7. Nambyakang sahanan dadauhan guru wisesa.

Pawos 60

Paruman utawi Pasangkepan sida mamargi prade:

1. Karihinin antuk suaran kulkul
2. Pamilet mabusana adat
3. Pamilet nenten makta gagawan
4. Sang ngayahang langkung ring satenga jeeg krama.
5. Tan maren ngastiti Ida Bagawan Panyarikan macihna antuk ngarihinin ngaturang banten cane ring meja ajeng prajuru sane kaaturang olih bendesa.
6. Pabacakan pangrauh kamargiang ring pamuput sangkepan.
7. Sakeng ngawit rauh puput sang ngayah patut malinggih trepti, sadurung katitah kangkat matangi, sang ngayah tegteg malinggih.
8. Sahanan pinaka pamutus mangda madasar antuk dasar tan piwal ring pamargi katah tur mawesana kabecikan.
9. Mutusang babawos tan sida antuk puluk, kaputusang antuk paswaran pinih akeh

Pawos 61

Pamutus daging paruman utawi sangkepan kabawos rajeg risampuni kacumponin puluk utawi madasar paswaran sane akehan.

Palet 6

Indik Pawiwahan

Pawos 62

1. Pawiwahan inggih punika patemoning lanang lawan istri malarapan panunggalan kayun tresna pada suka risajeroning alaki rabi matetujon ngardi keluarga langgeng subagia kadulurin antuk upacara yadnya manut sastra agama saha kaupasaksi sekala niskala olih prajuru.
2. Pidabdab pawiwahan ring Desa Adat Pikat majalaran pamargi kapurusa.

3. Pamargin pawiwahan wenten papalihan ipun luire:

- ha. Pepadikan
- na. Ngarorod
- ca. Nyeburin utawi nyentana.

4. Pidabdab sang pacang mawiwaha luire:

- ha. Sampun munggah daha wiadin teruna.
- na. Pamargine sangkaning pada tresna asih.
- ca. Ngambil Sang siyos Agama Hindu patut ngelaksanayang Upacara Sudiwadani kasaksiang olih prajuru dinas lan adat.
- ra. Urah-urih upacara sudiwadani, pamargine katanganin Parisadha Hindu Dharma
- ka. Pawiwahan patut nganutin sastra agama saha nganutin undang-undang perkawinan.

Pawos 63

1. Pawiwahan ring Desa Adat Pikat kabawos patut tur kukuh, yening:

- ha. Sampun nganutin pidabdab pawiwahan ring Desa Adat Pikat (puput babawosan tur kacihna antuk pangenduh majeng sang guru rupaka pradana, sasari panukun kulkul manut pararem)
- na. Sampun mawidhi widhana sanistannyane ngemargiang upacara mabyakala.
- ca. Sampun ngalaksanayang Tri Upasaksi.
- ra. Sampun munggah ring ilikita Desa Adat Pikat miwah Dinas saha ilikita siyos sane kapatutang manut daging Undang-Undang nganinin Perkawinan.
- ka. Warga Desa Pikat sane jumenek ring dura desa ngamargiang pawiwahan saha raruntutanya patut mesadok majeng prajuru desa lan banjar.

2. Pawiwahan kebaos tan patut utawi tan sah yaning :

- ha. Nenten melarapan antuk pada radin utawi malegandang
- na. Nenten kaupasaksi lan kakapikukuhang olih Prajuru Desa.
- ca. Ngambil rabi lintangan ring asiki sajabaning polih wak-wakan olih rabinnya.
- ra. Tan manut kecap sastra lan undang-undang nganinin perkawinan.

Pawos 64

Tata cara pawiwahan:

1. Sang pacang alaki rabi majalaran antuk papadikan patut masadok riin ring prajuru nganenin pamargin parabiane.

2. Pamargin papadikan madudonan:

- ha. Ngamargiang pasedek ring keluarga pradana.
- na. Yening sampun pada tulus, kelanturang pengambilan manut pasubaya tur kesaksinin olih prajuru desa lan banjar. Prade warga pradana sane kaambil kacihna puput, kaswaraang kulkul
- ca. Majauman galahe manut panamaya
- ra. Sang mawiwaha kangkat medal saking pakarangan sasampune ngamargiang pabea kala, utawi marebu.

3. Pemargin ngarorod, sang sane ngerorodang patut nganutin pamargi sakadi ring sor:

- ha. Ngamargiang pacelek tan kasepan ring awengi tur kaenter olih prajuru Desa utawi banjar sang pradana malarapan ilikita.
- na. Ngawentenang pamalaku utawi panglukuan jantos puput maduluran pasuguh pangrawos, sedah, lanjaran lan pajati tegep tur yaning sampun pada ledang, sang purusa nunas galah pacang mejauman utawi ngunya lan kaupasaksi olih Prajuru desa.
- ka. Kemargiang upacara mejauman utawi ngunya tur pemuput olih Prajuru kacihna suaran kulkul.

Pawos 65

1. Warga sane kaicalan angga kakuuban, patut masadok majeng prajuru muang Guru Wisesa saha nunas pitulung masaserep.
2. Prajuru desa adat lan dinas patut ngenterang maserep mangda nganutin tata kasutreptian desa.
3. Paseserep patut sampun polih wak-wakan Prajuru desa adat lan Dinas.

Pawos 66

1. Wong istri mobot tan kaangkenin utawi durung wenten pangangken sane nenten prasida kapuputang olih keluargan nyane patut digelis nyadokang majeng Prajuru desa adat lan Dinas mangda kadabdabin
2. Prade tan wenten sane ngangkenin, kuluwargaanyane patut mamerayacita ring Banjar lan Pura desa tur ngupakara rarene manut sastra agama lan dresta, saha kesaksinin olih prajuru banjar lan prajuru desa tur kasobyahang ring pesangkepan desa.

Palet 7

Indik Nyapihan

Pawos 67

1. Nyapihan inggih punika pajangkepan pakurenan palas makurenan.
2. Nyapihan patut mesadok majeng prajuru desa kacihnayang antuk ilikita Pengadilan saha akte perceraian.
3. Sang palas marabian durung nyihnyayang antuk ilikita Pengadilan saha akte perceraian. durung kabawos nyapihan.

Pawos 68

Sang nyapian, mawali adung makurenan patut ngalaksanayang upacara anyar pawiwahan

Pawos 69

1. Warga lanang mapawak pradana rikala mawiwaha, rikala nyapihan, mawali ke lanang ka kulawargan nyane. Rauh ring pakulawargan warga inucap:
 - ha. Kakuwub olih kulawargan nyane
 - na. Prade yayah renan nyane nenten kantun makrama utawi nenten maduwe kulawarga tugelan makrama, warga inucap tedun makrama
 - ca. Tedun makrama prade nyarengang pianak

2. Warga istri mapawak pradana rikala mawiwaha, rikala nyapihan, mawali ka kulawargan nyane.
Rauh ring pakulawargan, warga inucap:
 - ha. Kakuwub olih kulawargan nyane
 - na. Tedun makrama prade nyarengang pianak

3. Balu sane kabawos tan pageh ring swadhamaning balu luire :
 - ha. Melaksana semara dudu.
 - na. Matilar tan masadok
 - ca. Salah prawerti lan salah tingkah.
 - ra. Balu sane tan pageh, patut kabaosin olih keluarga tur kengin nunas paridabdab majeng prajuru desa.

Palet 8
Indik Sentana lan Paperasan
Pawos 70

1. Sentana wenten kalih soroh inggih punika :
 - ha. Prati Sentana inggih punika santana sane metu saking pawiwahan sane kepatutang.
 - na. Sentana paperasan inggih punika santana sane kapolihang malarapan antuk meras, sane kadulurin upacara pamerasan, miwah upasaksi sakala niskala, kapikukuhang antuk ilikita Guru Wisesa.

2. Pawiwahan sane tan manut, jantos ngawentenang sentana, patut kamanggala antuk upacara agama tur keutsahayang mangda kelanturang antuk kajantenan kawentenan nyane.

Pawos 71

1. Pawiwahan tan ngawetuang sentana, kengin meras sentana. kasaksiang sakala lan niskala tur polih pamutus Prajuru Desa lan Guru Wisesa.
2. Sang meras sentana patut mawirasa majeng kulawarga sane pacang meras lan kulawarga sane pacang kaperas lantur masadok majeng prajuru sanistannya asasih sadurung pamerasan kamargiang
3. Prajuru digelis nambyakang, sang rumasa tan lila patut nyadokang majeng prajuru sajeroning asasih sadurung pamerasan kamargiang.
4. Yening sampun tutug senger, tur nenten wenten nambakin, upacara pamerasan kengin kamargiang.

Pawos 72

1. Paperasan kalaksanayang sakadi ring sor:
 - ha. Sang kaperas patut meagama Hindu.
 - na. Kautamayang saking warga pancer kapurusa.
 - ca. Prade nenten wenten kadi aksara na, kautamayang sinalih tunggil mawit saking kulawarga tunggal sanggah utawi paibon lan dadia
 - ra. Prade taler tan wenten saking aksara na lan ca kengin mawit saking kulawarga pradana.

- ka. Yening taler tan wenten sakadi sane kabawos ring aksara na, ca, lan ra, kengin meras santana saking kulawarga siyosan.
- 2. Paperasan punika sinanggeh puput tur patut, macihna sakadi ring sor:
 - ha. Kaupacara pawidiwidanaan paperasan.
 - na. Kasaksiang olih Prajuru Adat, tur kasobyahang ring paruman Banjar lan Desa.
 - ca. Wenten ilikita Desa indik tata sulur paperasan.
 - ra. Polih pamutus saking Pangadilan Negeri lan ilikita saking catatan sipil.
- 3. Daha tua utawi teruna tua kangkat meras sentana sapisanan tedun mekrama desa.
- 4. Meras santana kengin langkungan ring adiri.
- 5. Sang sane kaperas tan kangkat sampun makrama utawi naenin mawiwaha.
- 6. Swadharmaning Sang meras sentana patut ngemargiang urah arih sajeroning kahuripan.

Palet 9
Indik Warisan
Pawos 73

- 1. Warisan inggih punika sahananing tatamian arta brana saha ayah-ayahan, utang piutang ngupadi kasukertan sakala niskala saking leluhurnyane arep ring sentanan nyane
- 2. Wawu kengin kabawos warisan prade wenten:
 - ha. Sang kapiturun utawi pawaris.
 - na. Katurunan ahli waris
 - ca. Arta brana miwah tategenan uthawi ayah-ayahan muah utag piutang.
- 3. Sane sinanggeh warisan luire:
 - ha. Druwe tengah makadi palaba pura, pustaka suci.
 - na. Pamrajan.
 - ca. Paguna kaya, utang muang piutang lan ayah-ayah.
- 4. Sane kabawos ahli waris inggih punika:
 - ha. Kaping ajeng pretisentana purusa, sentana paperasan.
 - na. Keluarga tunggalan sanggah utawi paibon lan dadya.
- 5. Sane ngawaris patut kantun ngamanggehang Agama Hindu.

Pawos 74

Swadharmaning ahli waris :

- 1. Ngamargiang utawi nyeledihi ayah-ayahan pawaris.
- 2. Nyanggra pah-pahan artha brana warisan.
- 3. Ngupakara kahyangan mrajan utawi pura amongan pawaris.
- 4. Nglaksanayang Upacara Pitra Yadnya pawaris lan leluhurnyane
- 5. Nawurin sawenten utang-utang pawaris.

Pawos 75

- 1. Warisan kengin kaepah olih sang patut ngawaris risampun swadharmaning ahli waris jangkep kalaksanayang.

2. Pah-pahan warisan patut mangda sadu arep ring sakatah ahli waris.
3. Yening tatinggalan guna kaya, pah-pahannyane taler kengin nganutin pasubhayan pawaris sadaweg kantun maurip.
4. Sentana daha tua patut polih pah-pahan aparo saking pahpahan sentana purusa.
5. Sane tan patut polih pah-pahan warisan, sakewanten kengin muponin pah-pahan warisan sakadi ring sor:
 - ha. Sang mulih kadaha, mulih truna riantukan polih nyeburin riyantukan polih ninggal kadaton.
 - na. Balu luh utawi balu muani sane pecak nyeburin.
6. Sinalih tunggil sang ngawaris ring ajeng kengin tan polih pah-pahan prade:
 - ha. Alpaka ring guru rupaka.
 - na. Nilar agama Hindu
 - ca. Prati sentana lanang kesah mawiwaha nyeburin , utawi kesah maperas, sowang-sowang kabawos ninggal kadaton.
7. Pawaris rikala kantun maurip kengin mapaweweh arep ring sentana, pinaka:
 - ha. Jiwa dana, tatadan utawi bekel pinaka paweweh leleb ring pianak sane kesah mawiwaha.
 - na. Pangupa jiwa, paweweh saking pawaris marupa pamupone kemaon.
 - ca. Pedum amongan utawi pedum raksa pah-pahan waris, padgatakala ngantos pastika pawaris arep ring ahli waris.

Pawos 76

1. Prade sajeroning pakulawarga wenten sang sane ngawaris langkung ring adiri, kapatutang:
 - ha. Ngawentenang paigum indik pedum waris inucap.
 - na. Yening tan prasida igum wenang katunasang ring prajuru desa.
 - ca. Prade wenten taler tan terima ring panepas prajuru kengin nunas pamutus ring Guru Wisesa.
2. Yan wenten pacang nunas tatimbang ring Prajuru Desa, prajuru patut nitenin lelintih kala nibakang panepas sane kapatutang sakadi ring sor:
 - ha. Sang sane ngawaris saking purusa.
 - na. Papernahan ka samping.
 - ra. Yening tan wenten kadi inucap ring ajeng sami padruwen pawaris kasukserahang ring Paibon.
3. Prade wenten kantos ngepah karang ayahan desa sowang-sowang ahli waris patut masadok ring prajuru desa tur sami katedunang ngamargiang ayahan krama ngarep.

Palet 10

Indik Panyanggran Desa utawi Banjar

Pawos 77

1. Warga Desa utawi banjar sane nangun karya Panca yadnya, warga inucap patut polih pangremba sane kadabdabin prajuru desa utawi banjar manut pinunas sang anangun karya.
2. Panyanggran majeng warga anangun karya , kapidabdabin manut pararem desa utawi banjar sowang-sowang.

PANCAMA SARGAH
Sukerta Tata Palemahan

Palet 1

Indik Druwen Desa

Pawos 78

Druwen Desa Adat Pikat inggih punika :

1. Pura wiadin kahyangan desa makadi : Kahyangan Tiga (Pura Puseh, Pura Desa utawi Bale Agung, Pura Dalem) ,Pura Manik Mas, Pura Jero Dukuh, Pura Balang Tamak lan Pura Prajapati, Pura Beji.
2. Setra Desa, Pura Prajapati, Pura Beji lan Pura Dukuh kawawa Desa Adat Pikat lan Pangi
3. Tanah desa makadi *PKD*, Carik Palaba Pura Puseh bulian sibak, Cari Pura Bale Agung Bulian sibak, Carik pelaba Pura Dalem abulian sibak lan Tanah Desa ring sajeroning pantaraning Bukit Mucung rauhing Bukit Munting sane nenten mepil utawi mesertifikat.
4. Tanah linggih pura, tegak banjar saha wangunannyane, rurung ring sajeroning Desa Adat Pikat.
5. Labda Pacingkremen Desa (LPD) Desa Adat Pikat.
6. Druwen Desa siyosan sane kapikolihang salantur ipun.

Pawos 79

1. Druwen Desa patut kapiara olih warga desa.
2. Druwen Desa patut kapastikayang antuk ilikita.
3. Pura Druwen Desa kaempon olih pangempon manut pah-pahan Desa Adat sane kaenter olih prajuru Desa Adat.
4. Pura Dalem lan Pura Prajapati miwah pelinggih sawengkon wawidangan nyane, pengaci lan Pangayum nyane kasangra olih Desa Adat Pikat lan Desa Adat Pangi.

Palet 2

Karang lan Carik

Pawos 80

1. Karang pumahan miwah teba patut mawates antuk tembok sanistania pagehan.
2. Wates dulu kakaryanin tur kapiare olih sang madruwe karang, pinaka gagaleng sejabaning tegal lan carik megaleng ke teben.
3. Wates sane majeng kamargine utawi kerurunge patut katembok utawi kapagehin renes lan asri
4. Warga desa sane ngeed tanah, kangkat kantos adepe agung (1,75 meter) saking wates ka jero karang panyanding.

Pawos 81

1. Sajawaning toya sabeh, nenten dados wenten toya ka dura pekarangan anak teosan.
2. Nganini luu utawi mis kadabdabin makadi ring sor:
 - ha. Warga Desa Adat Pikat mangda tegteg miara kabersihan, kaasrian wawidangan parahyangan lan palemahan, wenten tan wenten titah sakeng bendesa utawi prajuru
 - na. Krama , warga, lan tamiu sane wenten ring waidangan Desa Adat Pikat patut stata nyagra kabersihan wawidangan.

- ca. Sahananing mis sane metu sakeng raga, wawidangan ngraga patut kadabdabin sabecik-becikne utawi kagenahan ring wadah mis sane sampun kasiaga.
 - ra. Shananing mis patut kapilah tur kawadah. Mis plastik mapupul mis plastik, mis don-donan mapupul mis don-donan, blah-blahan mapupul blah-blahan.
 - ka. Warga Desa Adat Pikat mangda matitetin ngangge plastik.
 - da. Soang-soang warung, penggak utawi genah mausaha patut nyiagaang genah mis manut papilahan.
 - ta. Sahananing mis tan kapatutang kaentungang ka dura karang utawi tanah duwe, sajaba sampun maduwe genah mis sane sampun kapastika oleh desa.
 - sa. Banyu, pamasuhan, yeh umbah-umbahan, yeh blengbeng utawi sakeluwir nyane tan kapatutang ngaromonin ka dura karang utawi tanah duwe.
 - wa. Sang sapa sira ja tan kapatutang mabacin ring jalinjing, telabah, utawi tukad.
 - la. Sang sane ngawigunaan toya jelinjing, telabah, utawi tukad, bilih-bilih angge masiram, mangda tegteg nyagra kasopanan.
 - ma. Mis sane metu sangkaning upakara utawi upacara mangda kapuputang ring wawidangan genah ngamargiang upakara utawi upacara.
 - ga. Sang sapa sira piwal utawi murug tan nganutin nyagra kabersihan kakeninin danda manut pabuat.
3. Yan wenten memurug ring kawentenan wiwit (1) muang wiwit (2) wenang kamargiang sakadi ring sor :
- ha. Sang rumasa kaembahin toyo utawi kaentungin luu patut melungguhang rihin ring sang melaksana
 - na. Prade ri sampun kapalungguhang sang melaksana nenten ngarengayang, sang kaembahin toya utawi kaentungin luu kangkat ngaturang wicara inucap ring prajuru desa.
 - ca. Prajuru desa patut digelis maosin wicara inucap tur ngicenin pamutus saha nibakang pamidanda manut pararem.
4. Yaning wenten jatma kantos ngamedalang rah utawi lepas busana ring wawidangan suci patut mepahayu genah punika manut panugrahan ida sang Sulinggih, saha katuntun olih prajuru desa tur sang melaksana katur ring guru wisesa.
5. Yaning wenten jatma sane melaksana byota sajeroning desa adat, sang melaksana patut mapahayu desa manut panugrahan Sang Sulinggih, prade sang melaksana tan katemu, sane ngamargiang pamahayu desa wantah Desa Adat Pikat.

Pawos 82

- 1. Sapasira ugi nenten dados ngalah-lah tanah pakarangan, tegal lan carik padrebenan jadma siyosan, napi malih sane kantun kadruwe olih desa sakadi wawidangan kayangan, setra, margi miwah sane siyosan.
- 2. Prade wenten sang ngalah-lah tanah, patut ngawaliang tanah inucap, sahe keni pamidanda sapatut nyane, manut pararem.
- 3. Matimbang karang ayahan desa, kapidabdabin sakadi ring sor
 - ha. Sahananing karang desa sane sampun kaayahang olih krama desa patut kagenahin olih sang ngayahang.

- na. Yaning wenten karang ayahan, sane tan kaayahang lan kagenahin ngantos kalih warsa, patut kadruwe antuk desa tur kawaliang ke banjar sowang-sowang sane ngawidangin.
 - ca. Krama ngarep sane pacang matimbang karang Desa patut polih uwak- uwakan saking prajuru banjar lan Desa.
 - ra. Krama Desa tan dados matimbang karang ayahan desa sajabaning sampun molihang panguak ring paruman utawi ring sangkepan.
 - ka. Prade wenten karang Desa kabebeng, mangda kautsahayang wenten marginnyane olih prajuru adat sanistania adhepa agung (1,75 meter),
 - ta. Yaning wenten karang ayahan desa, jaga ke anggen olih desa Adat sakadi ka anggen margi lan sane siyosan sang nuwenang tanah ayahan desa punika tan dados tulak, nanging Desa patut ngentiosin pawangunannyane manut panglokika
- 4.Warga utawi krama jagi matimbang wewangunan sane kewangun ring karang ayahan desa kedadosang nimbang risampun kaputusan ring jeroning paruman.

Palet 3

Indik Papayonan

Pawos 83

- 1.Matanduran tataneman patut kapidabdabin mangda nenten ngawetuang bhaya.
- 2.Tataneman sane ngawetuang bhaya patut kategenang olih sang aduwe tataneman.
- 3.Tataneman sane ngawetuang pikobet patut kadabdabin olih prajuru rauh pamutus nyane.

Palet 4

Indik Wawangunan

Pawos 84

- 1.Sapasira ngawangun mangda nginutin daging asta bumi miwah gagulak asta Kosala Kosali saha ilikita guru wisesa
- 2.Wawangunan tan kagkat ngungkulin utawi nyapcap kapisaga, karurung miwah kamargine.
- 3.Wewangunan ring sisin margi mangda kakaryanang telajakan mejimbar sanistanya 3 tampak ngandang sang aduwe sakeng panyengker
- 4.Barang utawi piranti wawangunan tan kangkat nehen langkungan ring arahina ring margi utawi ring rurung.
- 5.Jana seos agama Hindu kangkat nangun genah ibadah risampune tegap gaguat.
- 6.Wawangunan sane tan nginutin gagauat ring ajeng, patut kabawosin.

Palet 5

Indik Wawalungan

Pawos 85

1. Warga sane maubuh-ubuhan patut nabdabin ubuh-ubuhan nyane mangda ngawe rena maka sami.
- 2.Ubuh-ubuhan warga sane ngawetuang leteh utawi ngusak-ngasik patut kapelungguhang karerehang pamutus pamargi.
- 3.Tan kawenang ngangonang utawi negulang wawalungan ring genah tan sapatut nyane.

4.Sapasira ugi tan kapatutang ngusak-asik baburuon sawewidangan Desa Adat Pikat, sakewanten patut kadabdabin.

SADTHAS SARGAH
Indik Baya Wicara miwah Pamidanda

Palet 1

Indik Baya

Pawos 86

- 1.Sakeluiring kahanan sane ngawetuang pikobet, dukkita, duskertha ring warga utawi krama kasinanggeh baya.
- 2.Bacakan baya luire:
 - ha. Cora bhaya : baya sane rauh sakeng manusa corah
 - na. Ripu bhaya : baya sane rauh sakeng meseh
 - ca. Geni bhaya : kapuwunan
 - ra. Toya bhaya : blabar, gentuh, Sunami
 - ka. Bhayu bhaya : angin linus
 - da. Pertiwi bhaya : tanah longsor, Linuh
 - ta. Baya siosan sane metu saking buana agung maka miwah buana alit.
- 3.Sang melaksana corah sane ngawetuang bhaya kasinanggeh dusta.

Pawos 87

- 1.Warga desa sane katiban baya patut digelis nunas pitulung ring krama utawi warga siosan, saha matur supeksa ring prajuru utawi ring sang wenang mawosin.
- 2.Jadma katiban baya, utawi sang sane mangguhin bhaya inucap digelis nyuarayang kulkul maka piuning ring warga siyosan, tur patut digelis masadok majeng prajuru nguningayang indik bhaya inucap.
- 3.Warga desa patut mapitulung majeng sang kenit baya saha magegawan manut kawentenan bhaya
- 4.Warga desa sane uning ring jadma malaksana dusta, patut digelis nyadokang majeng prajuru desa utawi banjar .

Pawos 88

- 1.Ritatkala masaserep utawi nureksain patut nunas panguwak rihin majeng prajuru banjar utawi desa.
- 2.Masaserep ring sios desa patut kaenter olih prajuru banjar utawi desa kasarengin olih Guru Wisesa muah prajuru banjar lan desa genahe masaserep.
- 3.Prajuru patut nuntun mangda pamargin saserepe jenar rahayu.

Palet 2

Indik Wicara

Pawos 89

- 1.Sane wenang mawosin makadi mutusang wicara ring desa inggih punika prajuru desa risampune polih tatimbang olih kertha desa, pemargine sakadi ring sor :
 - ha. Kelihan banjar, pradene sang mawicara matunggilan banjar.

- na. Bendesa adat, pradene sang mawicara sami-sami ring patunggalan Desa adat nanging siyos banjar utawi wicara inucap nenten prasida kapuputang olih kelihan banjar.
2. Tata dudonan mawosin saha muputang wicara warga desa kadi ring sor :
- ha. Kaping ajeng kabawosin olih kelihan banjar.
 - na. Tan cumpu ring panepas kelihan banjar katunasang ring panglingsir banjar.
 - ca. Panglisir banjar tan kacumpunin katedunang ring paruman banjar.
 - ra. Paruman banjar tan katinutin, kengin nunasang ring Bendesa.
 - ka. Bendesa tan prasida muputang tincapang ring kerta desa adat ,majelis desa adat manut undagannyane lan utawi ring Guru Wisesa.

Palet 3
Indik Pamidanda
Pawos 90

- 1. Desa utawi Banjar wenang niwakang pamidanda ring warga Desa utawi Banjar sane sisip.
- 2. Paniwak inucap kamargiang olih Bendesa utawi kelihan banjar.
- 3. Sane patut katibakin Pamidanda sakadi ring sor :
 - ha. Nilep druwen desa utawi banjar
 - na. Melencerin
 - ca. Nyagsag wirasa.
 - ra. Angrugada prajuru .
 - ka. Mamurug daging awig-awig lan perarem Desa.
- 4. Pamidanda luwire :
 - ha. Ayah-ayahan panukun kasisipan manut pararem
 - na. Danda arta utawi saha panikel-panikel urunan.
 - ca. Rarampagan inggih punika ngambil barang druwen sang kasisipang manut ageng alit kasisipannya.
 - ra. Pangupakara lan panyangaskara.
 - ka. Kasepekang (krama lan kakuwuban nyane nenten kaicen matemu wirasa sareng krama utawi warga sawewidangan sakemawon prajuru tegteg ngiket wirasa sajeroning ngluruh panepas)
 - da. Kanorayang
- 5. Pamidanda sane katiwakang patut masor singgih manut ring kasisipanyane utamannya ngamanggehang kasudamala Desa.
- 6. Jinah utawi raja brana pamidanda, ngranjing dados druwen banjar utawi desa.
- 7. Tata cara ngemargiang pamidanda sane munggah ring wiwit (4) kapidabdabin manut pararem.

SAPTAMAS SARGAH
Nguwah Nguwuhin Awig-Awig
Pawos 91

- 1. Nguwah-nguwuhin Awig-Awig Desa puniki kamargiang antuk paruman desa.
- 2. Paruman inucap mangda kadasarin antuk pikarsa krama desa adat yadiastun kamedalang antuk prajuru sinunggil wiadin sinarengan.

Pawos 92

- 1.Sakaluiring sane wenten sadurungnya patut kaanutang ring daging Awig-Awig puniki kadulurun antuk pararem-pararem.
- 2.Sakaluwiring sane durung kabawos sajeroning Awig-Awig puniki patut kamargiang manut tata cara sane sampun ketah mamargi kadulurin antuk pararem-pararem

ASTAMAS SARGAH PAMUPUT

Pawos 93

- 1.Awig-Awig puniki kawastanin Awig-Awig Desa Adat Pikat
- 2.Awig-Awig puniki kamargiang ngawit kaingkupin utawi kararemin.
- 3.Risampune awig awig puniki kakukuhang awig awig adat pikat sane kakukuhang duk warsa siu sangangatus sia dasa utawi 1990 kadaut tur kajantenang nenten mamargi malih.

Pawos 94

- 1.Awig-Awig puniki kasungkemin ring paruman duk rahina Redite Kliwon Tolu, pinanggal 26-09-2021
- 2.Awig-Awig puniki kalinggatanganin olih Bendesa Adat Pikat kasarengin olih Kelihan Banjar.

Bandésa Adat Pikat,



I KOMANG PUJA SUDARSANA, SE



Penyarikan,



I GEDE SATRIA WIBAWA

Petajuh,



I WAYAN SUMANAYA, SH

Petengen,



I WAYAN SEREGEG ARTAYANA


Klian Banjar Adat Intaran Buug

I GEDE SUARTIKA DYANA, ST



Klian Banjar Adat Cempaka

I KADEK KARIASA



Klian Banjar Adat Sente

I KADEK KARIASA




Pangrampih,

Majelis Désa Adat (MDA)
Kabupaten Klungkung
Bandésa Madya,



DEWA MADE TIRTA, S.Pd., M.Pd

Majelis Désa Adat (MDA)
Kabupaten Klungkung
Bandésa Alitan,



ANAK AGUNG GEĐE RAKA
SWASTIKA

Saha Uning

Majelis Désa Adat Provinsi Bali,

Bandésa Agung,



IDA PANGELINGSIR AGUNG PUTRA SUKAHET

Penyarikan Agung,



D. DEWA NYOMAN RAI
ASMARA PUTRA, SH., MH

Telah Dicatatkan

Pada Dinas Pemajuan Masyarakat Adat Provinsi Bali

Tanggal : 12 November 2024
Régistrasi Nomor : A/0019/1394/052/08/DPMA/2024

